

14. august 2026

UKA 2026/251

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Aatsitassarsiornerup, takornarialerinerullu iluini naatsorsuutigisamik ineriartornissap kingunerisaanik Nanortalik, eqqaanilu nunaqarfiit siuariartornissamut, suliffissanut, inuussutissarsiutillu ineriartortinneqarnissaannut qanoq pitsaanerpaamik piareersarneqarsinnaanerit pillugu nassuiaasiornissamik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat UPA2027 tikitsinnagu Inatsisartunut agguanneqassaaq.

(Inatsisartunut ilaasortaq Hans-Erik Enoksen, Demokraatit)

Tunngavilersuut

Kujataa ukiuni tulluittuni periarfissarpassuaqalissaaq. Aatsitassarsiornermi suliniutit arlaqartut ineriartortinneqarput, sumiiffimmilu takornariartitsinermut soqutiginninneq annertusiartorluni. Nunap immikkoortortaani siuariartornissamik periarfissanik nutaanik ukiorpassuarni pisariaqartitsisimasumi suliffeqarfinnik nutaanik, ingerlatsinerunermik, najukkamilu aningaasaqarnerup patajaannerulerneranik tamanna pilersitsisinnaavoq.

Iliuseqanngikkaannili ineriartortoqarneq ajorpoq. Aatsitassarsiornerup, takornarialerinerullu iluini periarfissat Kujataata tamakkiisumik pissarsiaqaatigissappagit, piffissaagallartillugu pilersarusiortoqartariaqarpoq. Ingerlatat annertusitinnagit sinaakkutit suut inissinneqariissanersut inuiqatigiittut isummertariaqarpugut. Ilaatigut attaveqaasersuutit, inissiat, nukissianik pilersuineq, nunaminertat inuussutissarsiorfiit, takornarissanut atugassarititaasut, najukkamilu piginnaasanik ineriartortitsineq pillugit.

Pingaartumik Nanortalik, eqqaanilu nunaqarfiit ineriartornissami eqqugaasinnaapput. Kujataani periarfissaalerumaartussat arlallit eqqarsaatigalugit sumiiffik qitiusumik inissisimavoq, tamannalu pillugu ineriartortitsisoqalerpat Nanortallip piareersimanissaa aalajangiisuuvoq. Nanortallip eqqaani ineriartortitsinissamik periarfissarpassuit pisut, pingaarnertut naleqalersitsinissap najukkami pinissaata qulakkeerneqarnissaanut inuiaqatigiittut ersarissumik pilersaaruteqannginnerput ilumoorsinnaanngilaq.

Aatsitassalerinerup, takornarialerinerullu iluini ingerlatsineq annertusissappat umiarsualivinnut, assartuinermi aqqutunut, inissianut, nunaminertanut inuussutissarsiorfiusunut, nukissianik pilersuinermit, takornarissanut atugassarititaasunut, pisortallu sullissinerinut nutaanik piumasaqaateqalissaaq. Pissutsit taakkua ullormit ullormut iluarsineqarsinnaanngillat. Tamat isiginnissuseqartariaqarpoq, politikikkikullu pingaarnersiuisoqartariaqarluni.

UKA 2026/251

J.nr 01.25.01/26EM-LABU-00251

Qupp. 1 af 2



DEMOKRAATIT

Aatsitassanik piiannikkut, takornialerinikkullu periarfissanik nutaanik pilersitsisoqartillugu tamanna najukkami suliffinnik, najukkami aningaasaliinernik, najukkamilu inuiaqatigiinnik nukittunerusunik pilersitsiviusaaq. Nanortalik, eqqaanilu nunaqarfiit ineriartornissap piareersimaffiginissaanut pisariaqartunik sinaakkutissinneqartariaqarput.

Tamanna pillugu ilaatigut umiarsualiveqarnerup, assartuinnermi aqqutit, inissianik ineriartortitsinerup, nunaminertat inuussutissarsiorfiusut, nukissianik pilersuinerup, takornarissanut atugassarititaasut, piginnaasanillu ineriartortitsinerup iluini pisariaqartitat nassuiaatip ersarissartariaqarpai. Ilutigisaanik pisortat aningaasaliineri, kommunit pingaarnersiuiineri, privatimillu aningaasaliinerit qanoq pitsaanerpaamik sunniivigeqatigiissinnaanersut nalilertariaqarpaa.

Tamanna tunuluaqutaralugu neriutigaara Naalakkersuisut, Inatsisartunilu partiit sinnerisa nassuiaatissatut siunnersuutigineqartoq tapersersussagaat.

Pisortanut aningaasatigut allaffissornikkullu kingunerisassai

Nassuiaasiornermut atatillugu aningaasartuuteqassaaq. Taakkua ilinniagartuup ukiumut sulinerani 500.000 koruunit sinnissanngikkai naatsorsuutigineqarpoq.

Namminersortunut aningaasatigut allaffissornikkullu kingunerisassai

Nassuiaammut atatillugu soqanngilaq.

Innuttaasunut aningaasatigut allaffissornikkullu kingunerisassai

Nassuiaammut atatillugu soqanngilaq.